

四庫全書

史部

欽定四庫全書

閩中理學淵源考卷四十一

廣平府知府李清馥撰

三山明初諸先生學派

嘗聞三山前輩言晉安襟帶列郡數世枌榆百年
桑梓流風善政猶有存者自李氏椅常氏袞而後
若蔡忠惠李忠定梁文靖諸公遺教未泯而一時
閩產遞有碩彥大賢接踵繼起山川啟運人傑挺

生章章如是今考自洪永以降風氣初開諸儒說
經考道尚有典型三山舊志曾言明初諸子其學
多以濂洛為宗正嘉間新進後起一唱百和晉安
諸先正不敢倍其師說蓋自鄭氏景初而下闡明
道術演繹聖真修己誨人篤學力行庶幾升洙泗
之堂尊博約之訓矣茲錄國初諸儒本傳其門徒
尚待考訂至正嘉以後迄於隆萬而下按時世分
錄之大抵世道升降消長學術之淳漓繫之矣尚

論者溯厥源流尚有可稽焉乾隆丙子九月望

日

司訓鄭景初先生旭

鄭旭字景初閩縣人居家孝友有信義其學主以五經
旁獵子史與王傅林誌友善以學行辟為國子掌儀太
祖選德望十人傅東宮旭名第二後以蜚語謫吏雲南
餘二十年建文中薦起為高安訓導所著有詩經總旨

初學提綱咏竹稿等書

閩書考

道南源委

分省人物

編修陳先生景著

陳景著名湜以字行閩縣人舉永樂十三年進士第三人授翰林院編修預修五經四書性理大全以母老乞便養改福州教授生徒多所造就

閩書

御史游伯方先生義生

游義生字伯方連江人洪武二十一年進士仕御史議論慷慨太祖欲撤亞聖配享義生極諫忤旨繫獄死

道南

源委

叅議孫庭秀先生芝

孫芝字庭秀連江人洪武中以歲貢授慶都知縣陞沔陽知州太祖從劉三吾之議欲削孟子書如視君寇讐聞誅獨夫等語共八十五條不以命題取士芝上疏極論以為不可其議遂息歷官山西叅議乞歸

道南源委

閩書

叅政鄭先生居貞

鄭居貞侯官人洪武中舉明經歷河南左叅政與方正

學孝孺友善孝孺教授漢中居貞作鳳雛行贈之孝孺
難作居貞亦坐死所著有閩南關隴歸來檜庭諸稿孫
洎亦能詩

閩書

學正鄭先生濟

鄭濟閩縣人任嘉定教諭儋州學正日進諸生與啟迪
所著四書書經講解行世

閩書

按察洪遵道先生順

洪順字遵道懷安人永樂二年進士時初選翰林庶吉

士二十八人以比二十八宿順與焉引見上勉以立志
進學久之授刑部主事有李將軍者詐取囚金反誣吏
張緣受之同列畏李之強皆欲坐緣順曰李固可畏緣
不可憐耶竟坐李仁宗監國稱其廉潔持法賜勅褒嘉
未幾左遷行人尋命與修五經四書性理大全諸書丁
艱起復陞山東按察僉事時山東遭唐賽兒之亂順至
剡理冤抑撫循凋瘵青州有趙訓導年老無僕妾諸生
為娶一婦時時酗酒詈趙諸生張剛惡婦無禮殺之尋

逝去婦家訟趙抵罪獄已具順讞獨心疑召諸生詢之
惟剛三月不至齋舍退而訊之剛自伏曰公神人也諸
生娶此婦以事吾師而背戾若此恐師老命懸此人
是以殺之今師存剛死固所甘心順義其所為請於朝趙
得釋而剛亦免死歲旱蝗發賑倉儲數萬不待上報尋
陞按察使命下而卒從弟英

閩書

遺佚鄧子靜先生定

鄧定字子靜閩縣人洪武初與兄誠並徵遺佚誠應聘

定獨不出削跡東郊結廬竹嶼同時名士如王恭陳亮
鄧誠陳申相與詠賡有畊隱二卷

閩書

侍郎薩廷圭先生琦

薩琦字廷圭閩縣人舉宣德五年進士選翰林庶吉士
授編修預修仁廟實錄陞禮部右侍郎詹事府少詹事

為人狷潔不苟合學有源委

閩書

主事鄭汝明先生亮

鄭亮字汝明閩縣人宣德八年進士仕戶部主事有文

名家居學徒造門問業孫伯和

閩書

訓導游汝哲先生宣

游宣字汝哲連江人天順中恩貢授博羅訓導成化初上疏以宋熊禾闡明儒教表章經旨宜隨楊羅諸儒後從祀廟庭下廷議大學士彭時言禾原籍建陽立祠致祭為宜從之以父老乞歸養禮部言宣年力未衰教職修明乞宣年俸一半着原籍支領代養其親庶臣職子道兩無虧缺此特典也士林榮之

通志

孝廉高秦仲先生淮

高淮字秦仲長樂人永樂丁酉舉人貫通三禮嘗代邑
令作諭俗文為時所稱以鄉舉入都時同里姻舊多居
要地淮自守嚴正不徃謁居國學數歲以祖母父母春
秋高乞歸養自稱竹所老人著書三十餘卷解縉馬鐸
為之序

新福州府志

教諭曾先生師孔

曾師孔懷安人景泰癸酉鄉薦初授嘉善諭再補合肥

師孔宅心嚴正問學有淵源勢利聲華未嘗一涉胸臆
諸生貧者徃徃捐常祿助之兩地弟子交稱為良師

閩中理學淵源考卷四十一

欽定四庫全書

閩中理學淵源考卷四十二

廣平府知府李清馥撰

吳聞過先生海學派

邵氏銅撰聞過齋集序畧曰閩自陳述古季慈鄭閔
中周公闢劉執中五先生倡道於前繼而楊龜山羅
仲素李延平三先生出至朱夫子集羣賢之大成益
講明於後道德入人之深世號海濱鄒魯又如胡文

定致堂五峯籍溪蔡西山父子劉白水屏山黃勉齋
陳北溪真西山潘瓜山熊勿軒諸賢彬彬輩出行表
表皆可師法故閩之士習不以浮文勝質為先而以
躬行寔踐為急俗尚之淳清修苦節有東漢名賢之
風又曰先生氣質剛明學識醇正平日踐履篤實生
元季繹騷之時邁德於身自蔽於不耀之地駸駸乎
不知老之將至此其可惜云按邵公叙述先生繫於
諸儒學派之後以先生實元代遺民維道脉之緒者

也余繫之明者蓋一代之興必有耆儒夙學為邦典
型如存碩果以繼前修而啟來學顧守先待後之責
寄焉耳熊氏勿軒之繫於元吳氏聞過之繫於明皆
一轍也今考其派系載於篇乾隆丁丑四月下泮書

吳聞過先生海

吳海字朝宗閩縣人元季四方盜起隱居不仕學周程
張朱之學一時名人如貢師泰林泉生藍晦王翰皆雅
重之翰嘗仕元海數勵之至翰卒以節著海教養其子

偁底於成立焉明初部使者欲薦於朝力辭免既而徵
詣史局復力辭居家採摭古今孝子順孫節婦烈女與
兄弟之相友愛娣姒之能和睦者附以感應禍福以教
鄉里又著書言楊墨佛老為六經之賊管商申韓為治
道之賊遺事外傳為史氏之賊蕪辭荒說為文章之賊
皆足感人欲上之人悉取其書而禁絕之使天下曉然
知正道慕鄒魯之風平生虛懷樂善有規過者欣然立
改因顏其齋曰聞過為文嚴整雅奧咸有矩程而一歸

諸理後學咸宗仰之著聞過齋集八卷學者稱聞過先

生

道南源委

明史

分省人物考

簡討王孟敷先生傳

王偁字孟敷永福人父翰仕元元亡棄官匿永福山中
遂家焉後以節著偁少孤其母手疏先人之蹟與古今
豪傑大畧教之從父友吳海學於書無所不通弱冠領
鄉薦乞歸養母母沒廬墓六年永樂初以薦授翰林院
簡討進講經筵修永樂大典時內外儒臣及四方韋布

廣集閣下惟僞學博思深解縉第僞人品當在蘓子瞻之列其文亦相類詩則力追漢唐每擬薦以自代顧其為人氣節英邁議論爽發常有壁立千仞抗舉浮雲之志遇知己輿談吐凌駕超越視餘子瑣瑣不啻卧之地下以此名譽雖彰謗亦隨之尋坐事謫交趾從總兵張輔幕下時解縉出為交趾叅議督餵化州言僞於輔携以自隨僞與縉因共往廣東觀其山川言其可鑿贛江通南北道具草入奏會車駕北征縉見東宮還漢庶人怒

縉且欲陷東宮遂言於上上怒縉滋事勞民并偁皆逮
獄相繼死獄中所著有虛舟集子振以祖父死非命屏
跡不仕有司屢薦不起亦能詩

閩書

新福州府志

侍讀林尚默先生誌

林誌閩縣人年十四歲從王偁學日記數千言時出論
辨見鋒鏗以折長者偁曰此非所以求益為字曰尚默
因痛自克治沉潛學問涵浸淳蓄久而益富永樂中鄉
會試皆舉第一殿試一甲第二名授翰林院編修預編

性理及四書五經大全諸書陞修撰歷官右諭德兼侍
讀宣德元年預修兩朝實錄卒誌於學無不研究後學
多從質問經義性恬於世利蚤失父事母孝宗族有貧
而依異姓者悉歸而撫之與人交必誠必信每公退輒
閉一室以詩文自娛所著有周易集說鄙齋集

通志
道南源

委 分省人物考

博士林志仁先生慈學派

按先生在明初力學稽古其徒姚氏忠又以篤學稱

餘事實未詳茲特錄其派繫焉

博士林志仁先生慈

林慈字志仁長樂人力學稽古嫻於文詞洪武間以明
經薦任本縣訓導歷國子博士有詩集

通志

姚用恕先生忠

姚忠字用恕懷安人師事國子博士林志仁慈朝夕講
誦久之明理篤學深得聖賢之旨節儉恬淡雅好山水
不樂仕進自號耕雲山人

閩書

訓導林子野先生同學派

林子野先生以力學稱後游寓同安故三山學派無可考者茲特錄之

訓導林子野先生同

林同字于野閩縣人博學力行安貧樂道居家教授後進日踵其門洪武中寓居同安戶部郎李文郁師事之力薦於朝授同安訓導至官二日卒所著有銅

魚集

閩書

長樂陳氏家世學派

潘氏稼堂序陳氏詩系曰閩中詩人陳伯騶示余以先代之詩曰四朝詩系其稱詩也自香草堂集以下四十餘家其叙系也自信州公以下二十餘世終明之代成進士及舉於鄉者百有餘人凡兩尚書一侍郎禁近方面若干人又多賢而能文幾於人人有集考其淵源則三忠實始基之所謂三忠者宋景炎中陳氏之祖曰榮者率子弟起義兵以行軍司馬知福

新縣與元兵力戰而敗榮及其子宗傳姪吉成皆死
之陳氏之族死者一百七十七人其後多隱居教授
不仕躬修於家至有五世同居者至明初仲進首膺
薦辟仲完繼入翰林浸昌浸大至明季甲科乃絕家
運與國祚相為盛衰如此按陳氏二百餘年科名爵
祿蟬聯弗替而不知其根本皆由於一門貞忠炳蔚
其後世子孫尤能韜晦潛隱歷百年而後興天之所
以祚忠孝者如此其遠且大也今錄其著者載於篇

縣令陳伯康先生仲進

陳仲進字伯康長樂人耿介尚氣節洪武六年以儒士授宜陽丞攝孟津最調韓城久之擢令江山上特旨褒其惠政後坐勘灾忤旨被逮仲進曰吾以一身活萬命含笑地下矣既而釋之而仲進已卒歸櫬經江山父老泣留衣冠葬之子孫遂家江山弟仲完子登全從子洵

仁 閩書 通志 新郡志

掌坊陳先生仲完

陳仲完名完以字行洪武十八年進士授延平訓導改
寧國縣丞樂初用薦擢翰林編修尋陞左春坊左贊善
奉命授皇孫經貌恭氣和詞意懇款多所補益其持身
恭慎平居言如不出至討論古今據理是非確不可奪
仁宗在東宮嘗問其所長對曰職所當為不敢苟有畏
避仁宗甚重之歷官廿年不遷怡然自足仁宗恒言春
坊如仲完者不易得也及即位仲完前一年卒楊文貞
士奇為傳惜之

通志

閩書

中書陳思孝先生登

陳登字思孝洪武三十年以儒士授羅田丞調蘭谿浮
梁皆有治績永樂中以薦召入翰林預修國史授中書
舍人為入諒直博涉經史自三代秦漢以降鐘鼎金石
劉豕刻石靡不默識既入中書凡國家有大制作篆籀
之文皆出登手且負直不媿姍於所交遊面舉過失國

史實錄稱為剛正之士

閑書

侍講陳果之先生全

陳全字果之授翰林編脩修大典書召赴行在與修四書五經性理大全擢侍講署翰林院事公勤篤慎所著有蒙菴集子陵領鄉薦本字叔鹵耿介好古有詩文若

干卷

閱書

蔣氏閱學源流

羅宗讓先生泰學派

按黃未軒先生撰羅氏繹墓誌曰羅繹父泰以學問文章重一時雖未嘗仕進然其弟澤登永樂甲辰進士為名御史繹與兄紋同領永樂丁酉鄉薦為名師

儒其他及門之士躋巍登臚者不可勝數皆教澤所及再考林尚默先生撰羅處士泰麗澤軒記述其師曰林友從其友曰鄭介叔意必當時表著者其詳莫得考矣然觀黃公未軒所贊林公尚默所記其一時師資庭訓俱可追述茲錄傳中所及姓氏并附著其家學載於篇

羅宗讓先生泰

羅泰字宗讓福清人少從鄉先生宋瑜受春秋經既卒業

於訓導林友從潛心易旨故其學精於易春秋一時同遊如進士鄭澄初主事鄭介叔知縣鄭彥韜文學鄭廷玉鄭希晦林範伯輩咸與切磋講明鄉後學皆師尊之隱居教授凡四十餘年與諭德林誌侍郎薩琦尤友善勵行至老不衰宣德壬子應天尹聘司文衡泰辭曰布衣也以一鄉之善淑一鄉之人則可敢去取畿甸士哉平生好古遵禮輕財達生母喪家貧數年不能葬語及未嘗不泣下也年四十妻死不娶曰吾有子矣有覺非集

行世建安楊文敏榮志其墓弟澤舉進士子紋繹俱領

鄉薦

闕書

通志

鄭先生宣學派

按長樂瀕倚海墻朱子當日為學禁時曾避跡是邦
其高第弟子如黃文肅勉齋劉履之用之皆此邦產
也明代名人輩出陳氏仲進鄭氏世威諸公已別錄
矣至馬氏鐸李氏琪以巍科並著而馬公本傳稱其
初受禮於鄭氏宣遂旁通易詩書子史百家故特錄之

鄭先生宣

傳闕

脩撰馬彥聲先生鐸

馬鐸字彥聲其先樂平人宋宰相廷鸞之弟廷龍者自樂平來徙家廷龍之後有弟兄三人曰隆曰傑曰鈞皆舉進士鐸初受禮於先輩鄭宣遂旁通易詩書子史百家為文援筆立就永樂十年廷試與閩縣林誌俱在及第之列成祖知其同郡試之對曰風吹不響鈴兒草鐸應聲雨打無聲鼓子花見誌對遲成遂以為第一鐸對

蓋出夢語故響答如是既授翰林修撰成祖一再幸北
京命獻陵監國鐸與諸臣侍勞艱不避獨任不辭獻陵
屢顧學士楊士奇曰馬鐸可謂質實無二自是翰林學
士國子祭酒司業有公務出皆命鐸署攝鐸耿介伉直
表裡一致處事平恕而臨義執言自奉儉約與人交盡
誠遇危難急濟之間暇鼓琴讀書名其書室曰梅巖

闕書

閩中理學淵源考卷四十二

欽定四庫全書

閩中理學淵源考卷四十三

廣平府知府李清馥撰

副使林廷珍先生珙學派

按明初學者多屬朱門派緒其傳習說經猶存宋元
間諸儒家法三山林氏以易學倡教東南虛齋時弱
冠為諸生以僉憲臨江周公虛白命得登其門卒之
經學大明為有明一代經師之首海內宗之厥後陳

紫峰林次崕蘇紫溪通行其緒以易學成一家言於
是泉南習易者家絃戶誦虛齋嘗言閩中易學獨盛
於東南視他經倍蓰蓋推本先生倡明之功為多也
又虛齋撰公墓志載公以進士侍親家庭昆季七人
一門子姓負經術名士林者亦數十人歸休後杜門
教子孫讀書告戒使循理安分不得席勢凌物故子
弟勤約隱忍無一毫浮艷氣習又曰先生幼穎敏出
羣而沉篤嗜學讀書率至夜分又能以身體之以心

驗之最得聖賢遺趣其紬繹造言觀貼之義以闡發
學者自閩中及江寧兩浙之士及門受業者殆不可
計數焉今錄學派并著其家學載於篇

副使林廷珍先生玘

林玘字廷珍侯官人天順八年進士甫釋褐以親老乞
終養家居十有七年以易學倡教東南從游者屢滿蔡
文莊清亦往師焉既終大事赴京授刑部主事陞浙江
按察僉事弘治庚戌景寧賊嘯聚剽掠旁及閩中政和

浦城諸邑衆議屬玳剿捕玳發屬縣兵分駐要害以精銳千餘人直臨其穴破之遁入據松溪險隘衆難之玳曰賊勢已感攻之必下遂追逐得其渠魁斬戮數百人餘黨尚有散匿山谷者衆請盡殲玳恐濫及無辜出示准其投降又有遂昌黃岩等賊聚衆至萬人聞之膽寒玳又預為形勢疑之皆自解散陞雲南副使憫舊俗獠狂為別名分重禮教風俗一更以年老乞休許之玳行誼政治本自過人而文學復優所至上下翕然歸重其

卒也自有位以至鄉民咸痛惜之

道南源委

閩書

督學林廷玉先生瑋

林瑋字廷玉侯官人貌古冲晦葆有於無舉於鄉十年
不赴後登成化辛丑進士授行人遷御史言慎名器厚
國本七事為上所嘉納後出巡雲南言孟密不當立安
撫階亂事出萬學士乖違程尚書依附馬序班受賕鎮
守所漁利十汰八九狐鼠薰灌殆盡代者心不樂然敬
憚之曰吾閱御史多矣無如林者叅將縱麾下私於崖

奪印殺人塘覈實論罪降調數官叅將坐落職閒住安
乃者土官子土官坐事死獄中通把利其田言乃謀叛
普顯者土官弟嫂氏虞爭官誣以通黑脚夷三千八寇
皆繫獄十餘年被累死者百計土人懼其出則飛語謹
叟無敢白者塘駁曰乃叛從者何人寇何鄉黑脚夷至
三千時當有飛報征調事豈得自默乃顯得安置四川
轉督學南畿一時學者相慶得師卒於官人稱之曰林
道學南畿以塘同真西山德秀列祀學宮

閱書

陳氏家世學派

按陳氏叔剛父仲昌世家榮繡里林默齋先生嘗撰其筠軒記稱仲昌耕讀自樂不求聞知於人四子皆玉立夙成而長叔剛尤穎異再考讀本傳皆講治經學卓然有立故著其家學焉再按叔剛先生傳少從訓導劉氏九疇受春秋從諭德林誌學古文九疇先生未詳林氏誌已別見不另錄云

陳仲昌先生週

陳週字仲昌閩縣人嗜學問通春秋好為詩所居石潭之上種竹萬箇結亭栖隱嘗倚竹而歌曰修竹兮青青中虛兮外直素節兮貞姿寒暑兮一色泠泠風兮朝夕余舍之兮焉適子叔剛叔紹孫煒

侍讀陳先生叔剛

陳叔剛名振以字行閩縣人少從訓導劉九疇受春秋永樂十九年舉進士依親讀書從諭德林誌學古文宣德初召擢監察御史預修成仁二廟實錄遷翰林院修

撰篤學勤官守丁母憂廬墓終喪復故職纂修宣廟實錄上初御經筵選儒臣充講叔剛與焉後陞侍讀聞父病乞歸省居一年得疾遭父喪疾益甚竟卒年四十七叔剛溫雅潔慤出言行事皆有思裁為文亦復如是見人過密規而疏覆之過良時飲酒賦詩襟懷洒如也與安福劉忠愍球最善弟叔紹子煒

閩書

通志

副使陳先生叔紹

陳叔紹以字行精春秋學少無宦情有司欲以明經辟

弗就也。劉忠愍雅善叔剛，故聞叔紹名，以屬督學者。令補弟子員。時年三十餘矣。於是始有仕進意。舉正統十年進士，選監察御史。景泰初，朝廷多故，臺中建白彈擊，皆叔紹率先。陞湖廣按察副使。卒。叔紹有孝行，母病嘗糞，驗差。劇叔剛沒，孤煒甫十歲，叔紹撫成之。

閩書志

通

布政陳文耀先生煒

陳煒，字文耀，閩縣人。天順四年進士。成化初，選監察御史。出按南畿，尋命督北畿學。為人操履清正，學問該博。所

至以表名賢正風俗為務在臺中號敢言錦衣衛門達者自英廟時恃寵竊權屢興大獄莫誰何煒疏達諸奸利狀詔投嶺表中外快之南京給事中王徽以疏語稍侵閣臣外遷煒復為申救由是陳御史直聲震朝廷遷江西副使歷按察使晉右布政使江右俗素多訟煒屢折疑獄善為鈎距以得其情然煒雖號明察而用意甚厚惟恐濫時盜越獄有欲罪守卒故縱當死三十七人煒不可逸一盜而死者三十七人非法之平也竟從減

論弋陽樂平二邑人爭陂久不決煒為權其利樂平民
得決水溉田萬餘畝而代弋陽輸賦若干二邑便之其
知大體周物情多此類尚書彭韶嘗稱煒有澄不清撓
不濁之量云晉浙江左布政使卒於官

越章錄

閩中理學淵源考卷四十三

欽定四庫全書

閩中理學淵源考卷四十四

廣平府知府李清馥撰

林浦林氏家世學派

國家當元氣毓和之候者儒碩德羣出以茂贊鴻猷
弼成治平之世若林公者英彥萃於一門尤所希有
先公續語錄中亦載其家之風流篤厚可為師法與
有宋中州呂氏並述蓋推本於門祚昌明邦家盛事

耳文安忠清碩德大節皎然一時朝端儒舊如章楓
山王三原王文恪俱極推許而康懿文僖文恪諸公
皆培蘊家聲史稱其內行修潔淵源曼乎尚矣嘗讀
蔣氏垣述其先訓曰林浦林氏文安公一門父子孫
兄弟五登八座尚書相繼者百有餘年代稱儒臣居
恒率以家禮小學訓誨子弟故子弟出鮮僕從衣惟
布素未嘗以門第自視即槩觀當時先達皆遵儒教
於不墜其餘風吾猶及見邇來儒道寢廢習尚侈肆

爾曹不復見昔時秉禮樸雅之遺為可歎耳此見於
蔣氏閩學源流因并錄之以為培德修學鄉國風規
云

文安林亨甫先生瀚

林瀚字亨甫閩縣人父元美永樂末進士歷官撫州知
府公廉持大體吳聘君與弼贈金井水玉壺冰六字以
況其清瀚登成化二年進士選庶吉士授編修太宰王
恕薦以學行醇正累遷至國子祭酒九年陞禮部右侍

郎仍掌監事在國子十年有恩而嚴膳金之餘鬻置署舍屢與章懋講論為懋所重上疏請開科貢以進人才十二年陞吏部右侍郎再陞南京吏部尚書鎮定不搖人倚為重會災異率僚屬陳言皆切時政時御史王獻臣被逮疏乞寬宥以全風憲之職儒士孫伯堅等黃綠為中書舍人疏乞收回成命以杜倖進之門忤旨自劾不報十六年復疏請培植根本佑啟皇儲撫綏百姓增進賢才數事時與莆田林俊金華章懋浮梁張敷華號

留京四君子云正德初太宰缺丘俊石玠等交章薦瀚
剛方廉介改兵部尚書叅贊機務又疏勸武宗割私任
公不改先帝舊人不易先帝舊政遠近習裁貴戚為逆
瑾所深嫉會大學士劉健謝遷致仕瀚閱報嘆息御史
薄彥徽等上疏請留兼言上晏朝廢事日與新進佞倖
遊飲射獵上大怒械繫彥徽下鎮撫司獄鞠之詞連瀚
出為浙江右叅政致仕瑾後矯旨列瀚與健遷劉大夏
等為奸黨瑾誅御史凌相汪正等言瀚德尊望重詔復

舊銜時年逾七十命有司給人夫月廩時加存問瀚年
八十子庭棹為雲南叅政請去官侍養卒年八十六贈
太子太保謚文安瀚居家潔修而賓客過門必極款洽
里居時年雖高邁而泛應周旋禮意勤懇簡答題封皆
手自治為人內柔外溫至方若圓至勇若怯無卑賤愚
不肖處之若一獨非意相干者即之始知其不可犯也
章懋嘗言瀚有秦誓大臣之容又有柳下惠之介子九
人五子登科第諸孫多貴顯兩世之內位至尚書者五

世稱五尚書林氏子庭棹庭機

康懿林小泉先生庭棹

林庭棹字利瞻號小泉瀚次子弘治己未進士授兵部
主事歷郎中以持正不阿出守蘇州陞雲南叅政乞終
養服闋起江西叅政歷布政使以都御史巡撫保定嘉
靖初與張孚敬不合歸未幾起南兵部侍郎轉工部尋
拜大司空時世宗方稽古禮文創九廟建兩宮庭棹規
畫盡善嘗召見世宗顧左右奇其狀明日庭棹疏節財

用省營建二事世宗曰朕方顧若若乃言我若非林俊子耶左右對其父亦尚書非俊子也他日世宗又出御製憶邊士七言詩令和以進明年廟工成加太子太保又明年以疾乞歸庭榻穎悟絕人儀表竦秀雅善清談風流為一時之冠歷官內外厚下愛人蘇州七邑大水都御史不肯以聞庭榻上疏請蠲其稅雲南武弁財賦不給民無所出庭榻令牛馬布帛雜物俱得充不旬而辦晚蒙知遇家食而眷不衰卒贈少保賜祭葬謚康懿

通志 分省人物考

文僖林肖泉先生庭機

林庭機字利仁號肖泉瀚季子庭梟弟嘉靖乙未進士
選庶吉士授檢討遷國子司業嚴嵩用事士爭附其門
庭機寓與隣未嘗私謁歷南祭酒太常卿工禮二部侍
郎在南十年銓部每有推轂嵩輒擠之嵩罷始晉南工
部尚書滿考改禮部穆宗即位上疏乞骸骨得請歸先
是振武營兵變戕殺兵部侍郎黃懋官人心洶洶庭機

時為工侍攝篆持大體不苛細餉以時給亂遂弭工部
歲供內府費鉅萬計裁其濫溢中貴人斂手庭機廉靜
不近名內行修飭自奉如寒士姚江孫文恪嘗曰不忤
不求惟吾友為然莆田康司空同在史局額其齋曰學
林其為賢者所崇仰如是卒年七十六贈太子少保賜祭
葬諡文僖有世翰堂稿若干卷兄庭杓字利高以蔭入
太學歷官慶遠知府子熾煜俱官尚書光官戶部郎中
父子祖孫並以清忠品節見推於世云

通志
物考

分省人

文恪林對山先生爔

林爔字貞恒庭機長子嘉靖丁未進士選庶吉士授檢討是時庭機尚未選官父子一時為檢討詞林榮之久之充景恭王講讀官時嚴嵩專軸爔不與通會景恭王之國嵩欲改爔長史遣人諭意爔弗顧嵩敗累擢洗馬兼侍講校理永樂大典纂修承天大志陞祭酒書成加太常卿仍管國子事轉禮部右侍郎兼學士經筵講官中官奏修九陵爔奉旨往勘還奏惟長陵應修省費數

萬屬邊警條上強本七事改吏部右侍郎仍日講前後
經筵多所規諷首相徐階甚倚重之俄調贛南銓計部
署禮篆魏國公徐鵬舉昵少子邦寧欲易嫡嬪不許竟
封其長邦瑞萬厯改元進南工部尚書明年改禮部以
母喪歸爇立朝議論風采傾一時與張居正同為上所知
及居正在政府謝不見為居正所擠衣布蔬食齋居一
室問業之屢常滿戶前卒贈太子少保賜祭葬諡文恪
所著有學士集經筵講章子世言字天迪官戶部員外

詩詞清麗有叢桂堂集世勤見通志孝義部

通志

尚書林貞耀先生煙

林煙字貞耀庭機子熈弟嘉靖壬戌進士授戶部主事
轉員外郎嚴嵩執政請告里居者數載隆慶初補駕部
員外郎去烙馬之弊遷庫部郎出守盱江加意撫循屬
邑輸賦以縣封識轉文解省不覓一錢聽斷敏決郡中
謂之林一升以母艱歸補蘇州知府時張居正奪情迎
母之京道出姑熟煙不為禮入覲未嘗至其門尋遷粵

西臬副值兄爓訃至遂棄官歸養久之起兵備三衢轉
叅粵藩所至有聲擢同貳因災異極陳曠稅之害及諸
逮繫掩獄千餘言隨請假回籍起南岡卿轉大理遷刑
部侍郎晉南工部尚書累疏乞骸歸煙為人襟度高曠
而持正不阿有難進易退之節孝友之行通於神明家
世詞臣文學冠冕海內而博綜不倦雖奕葉貴顯清約
不異韋布年七十七卒所著有覆瓿諸集

通志

王氏家世學派

按中美先生以文章氣誼一時推重而立朝汲引士類懿德可風其後嗣出處皆能有立懋復諸公尤講明正學能振續學派於頽瀾之餘為三山先正師表抑又尚已

紀善王中美先生褒

王褒字中美侯官人孝友重氣誼故與林鴻諸人稱詩閩中號十才子洪武中鄉薦歷瑞州長沙兩學教授遷永豐知縣均平徭役課士親講授蝗為灾禱城隍而殪

永樂中與修高廟實錄陞翰林修撰修永樂大典為總裁官改漢府紀善時海內無事每遇禎祥或令節輒命從臣賦詩褒應制多稱旨褒性孝友剛直好汲引士類同郡陳仲完高廷禮王恭皆因褒以進所著有養靜齋集行世子肇以文學屢徵不起五世孫應鐘

閩書
福州府志

王開若先生肇

王肇字開若侯官人父褒少業於陳邨學詩林鴻學書王偁學畫高棟永樂宣德間以文學屢徵不起所著有

蒙齋集

閩書 通志

王懋宣先生應山

王應山字懋宣侯官人讀書博覽以春秋教授生徒烏石武夷間從者如雲其詩宗大厯婉而多致監司守令常式其廬食貧篤行無所干謁林宗伯爌纂修郡志多所裁定晚年苦心編摩著作甚富有經術源流又有閩大記三十三卷以識閩中文獻之盛

閩書 通志 道南源委 新郡志

叅政王懋復先生應鐘

王應鐘字懋復侯官人嘉靖二十年進士授庶吉士改
浙江道監察御史巡鹽長蘆東廠太監馬廣貪而虐應
鐘疏論之詔切責廣一時中貴斂跡按順天糾郡縣不
職者三十餘人嚴嵩柄國十監錦衣妄指奸細誣殺人
應鐘立白其寃守備昌平太監王敏朶削軍士應鐘數
其罪世宗為逐敏河套事起應鐘以前與議逮詔獄十
監錦衣修前隙幾斃杖下按浙江所至墨吏解綬去入
掌河南道會大計吏嵩欲蔽其私人應鐘弗許出督學

河南宗室有凌辱諸生者必繩以法轉山東叅政竟為
嵩所中罷歸環堵蕭然講明正學學使者宋儀望為建
書院於道山從游者雲集應鐘性端毅居官以嚴見憚
於鄉黨則謙恭樂易引掖後進常若不及年九十卒

通志

閩書 新郡志

林氏家世學派

按叔魯先生後以禮學世其家故特錄焉餘俟再考

教諭林叔魯先生鈍

林鈍字叔魯閩縣人永樂中領鄉薦會試乙榜授常山學訓導端莊嚴重動遵矩矱訓迪講論或至夜分陞江西興國教諭亦多所造就禮經有傳自鈍始既卒門人悲慕祠祀之所著有說鈴餘響等集三子曰清源曰泮曰濬淵俱登進士第

閩書

分省人物考

主事林用清先生清源

林清源字用清天順四年進士官終南京工部主事耿

介有父風泮濬淵皆從受學

閩書

尚書林用養先生泮

林泮字用養閩縣人父鈍永樂中舉人司訓常山遷興國教諭所至諸生懷之泮游太學時有誣奏祭酒陳鑑者泮伏闕抗疏直之成化八年第進士授南京大理評事歷寺正讞獄矜恤多所平反遷知廣州府忠義節烈多所表章嘗刻石厓門曰宋太傅樞密院使張世傑死節於此藍羹諸山峒蠻叛服不常泮親帥兵攻之擒其渠魁又豐湖堡賊劉庚作亂單車造壘諭降之擢廣西

叅政江西左右布政自以家世禮經言陳澔所著禮記
集說已列學宮而未得與從祀之列請舉行之不果用
入尹順天進戶部右侍郎總儲務權倖斂手正德三年
拜南京戶部尚書逆瑾嫉之矯旨令致仕復吹求其江
西罪罰米二百石輸邊泮家貧素又先被火既歸寄寓
山寺者數十年布衣蔬食談經不輟齒宿望重謙抑自
牧鄉人敬愛卒賜祭葬

通志

閩書

僉事林用淵先生濬淵

林澹淵字用淵成化八年進士初授刑部主事持法不阿官終浙江按察僉事

閩書

林氏家世學派

按德敷先生深邃禮經學者多北面受業今未得徧考其學派姑列著其家學以備叅稽蓋公素游羅整菴呂涇野二先生之門其所學所守綽有本末可考且壽考康強百年之多而子孫又眉壽逢吉信乎得天者厚矣再按公與鄭公善夫諸賢相友善善夫晚

卷四十四
歲嗜學勵志儒宗豈得以詞華置之哉故特志之附
交友中待考焉

郡守林德敷先生春澤

林春澤字德敷侯官人登正德九年進士授戶部主事
司權臨清屬武宗南巡諫者皆廷杖罰跪午門春澤抗
疏千餘言救之得免邊帥江彬扈從擅威福春澤持正
不阿彬為氣奪坐謫寧州丞移倅吉州遷肇慶府同知
島寇掠高州檄攝府篆春澤習知徭兵害民悉罷遣之代

以土著諸寇次第就擒擢南刑部郎出知程蕃府擇者
德文學之士分布諸寨為童子師時卧龍金石二司暨
通州寨屢年失地春澤與指揮協謀平復功未上為忌
者所中以候調歸春澤遂於禮經學者多北面受業其
詩詞宏偉與鄭善夫方豪何景明相倡和在吉州與羅
太宰欽順講學其在南曹復游呂宗伯柵之門究極旨
奧年百有四歲卒所著有禮記筌蹄二十卷瑞集十餘
卷子應亮戶部侍郎孫如楚工部侍郎各享眉壽

道南
源委

侍郎林熙載先生應亮

林應亮字熙載春澤子嘉靖壬辰進士初令潁上調秀水皆有廉聲守常德榮王官校挾勢為害應亮剗梟獍植善良縛諸不法者署諸理值大侵治糜賑藥全活者衆歷廣西江西藩臬晉南戶部右侍郎請告歸奉父杖履幾二十年時父春澤以程蕃太守家居子如楚弱冠登進士三世萊綵傳為盛事應亮少好稱詩為古文詞

與西蜀任少海溫陵王道思吳興蔡子木長洲皇甫子
安最相善徒以雅志經世不究其業云

通志

閩書

侍郎林道茂先生如楚

林如楚字道茂應亮子弱冠登嘉靖乙丑進士歷刑部
郎中善決獄歲減重辟十二人由督學任至少司空時
陵寢宮殿工役併興如楚殫力供事以績著生平好學
有恬退之節經書皆手錄著有奏議六卷碧麓堂詩文

集十二卷

通志

閩書

郎中鄭繼之先生善夫

附交友

鄭善夫字繼之閩縣人弘治十八年進士連遭內外艱
正德六年始為戶部主事權稅許墅以清操聞時劉瑾
雖誅嬖倖用事力告歸築少谷草堂金蓋峰作遲清亭
曰俟天下之清也巖居六載交游寡絕日晏未炊欣然
自適有司勸駕奪起改禮部主事員外郎武宗將南狩
善夫約諸曹郎伏闕上疏上怒杖之罰跪闕門跪時別
作諫草置懷中囑其僚方豪曰死為我出之幸不死居

頃之嘆曰世道如此何可為計哉復乞告歸徘徊越山
水探天台雁蕩者久之入武夷山中雖疴羸善病而游
覽不廢嘉靖改元薦起吏部驗封司郎中道病卒年三
十九閩中國初有十才子至善夫而始振風雅之道晚
乃厲志聖賢曰任重者身也途畏者口也致遠者道也
邪行亡乎體違言不存口要諸遠矣善夫交遊盡海內
名人其詩規倣少陵兼目時變故寓幽憂雖才韻弗克
古色精言高映霞表與山人孫一元衢州方豪鳳陽殷


雲霄最相善善夫沒後閩守汪文盛為營葬梓其集行

世

閩書

明史

通志



閩中理學淵源考卷四十四

欽定四庫全書

史部

閩中理學淵源考卷

四十五至
五十二

詳校官編修_臣謝振定

刑部郎中_臣許兆椿覆勘

總校官原任中允_臣王燕緒

校對官中書_臣田尹衡

謄錄監生_臣何永濤

欽定四庫全書

閩中理學淵源考卷四十五

廣平府知府李清馥撰

恭敏馬孔養先生森學派

三山學派傳習源流尚矣王信伯開洛學之先林少穎續紫陽之緒厥後黃勉齋肩紫陽學統遞有傳人至今稱朱門派的者曰何汪金許萃於金華然而閩之派別薪傳朱艾也元明以來遞相祖述至成化以

後人材輩出矣自吳聞過林尚默羅宗讓林德敷而後如恭敏馬公恭介鄭公尤篤守師說典型屹峙今著其師友派系載於篇再按朱氏經義考謂恭敏亦守心學之說與朱蔡有違言者而本傳稱其究心程朱之學今以本傳為據

恭敏馬孔養先生森

馬森字孔養懷安人嘉靖十四年進士授戶部主事權九江閩以廉能著歷知太平府雪冤獄裁中璫減供億

治行甲江南轉江西副使進按察使尋轉左布政使副
都御史巡撫其地森久歷江右多惠政時創三殿疏請
南糧改折省民間數萬金召為刑部侍郎尋改戶部坐
累徙大理卿與刑部尚書鄭曉左都御史周延得時稱
貫城三平遷右都御史戶部尚書以疾乞休穆宗登極
起為戶部上令太監崔敏取戶部銀六萬兩買金進用
森言先帝時買金二十日積月累僅能足數尋詔停止
以此金暫貯太倉今於數日內得滿一萬臣知不能也

且祖宗時御札皆下閣臣轉示各部院無司禮徑傳者更望率由舊章上乃止旋以母老乞終養賜馳驛歸服除屢薦不起初森為考官時夏言壻出其門欲介之見言謝不往嚴嵩聞而悅之森亦不附為徐階所重遂引用之居恒講明理學與歐陽德鄒守益羅洪先相質正要以程朱為宗其為侍郎歸值閩卒兩倡亂森角巾野服出諭之隨解散臨武劉堯誨撫閩議復夫甲庫役法森備陳其害議遂寢繼撫閩者南海龐尚鵬欲行條鞭

法森力贊決其卒也賜祭葬贈太子少保謚恭敏郡人
立報功祠於九仙山祀之所著有四書口義書經數言
周易說義春秋伸義辨疑地理正宗文集奏議若干卷
子熒歛熒字用昭以父蔭為南京都督府都事雅善文
辭歛貢士能詩

閩書

明史

通志

郭建初先生造卿

郭造卿字建初父萬程見縉紳母氏見閩閭造卿為諸
生器於父友馬恭敏森今受業羅文恭洪先之門閩中

倭起客遊吳越胡少保宗憲李襄敏遂禮致之新安汪
司馬道昆撫閩一見竒其文而高其行禮為上客而戚
都護繼光在閩有平寇功枉車騎於造卿甚委心焉大
司馬葉夢熊起家為其邑令欲延造卿署中度不能屈
乃館之蕭寺訂盟莫逆夢熊去而夢熊之侄名春及者
為惠安令邀定其政書葉氏二公交造卿惟恐不及也
造卿廩諸生例尚不及計偕會徐中行子與攝閩學強
遣計偕為儀郎所格造卿謂郎執例固當郎亦素聞造

卿名更過從相稱慕久之卒業北雍王文肅錫爵時為
祭酒臨其舍遇以博士或邀造卿試中書不從文肅大
稱善居頃之中行以閩觀察使入覲而戚繼光鎮薊門
交辟造卿為客造卿曰徐公於我厚厚在吾親葢俎豆
我父旌表我母我不可不往則之徐既至徐不久卒造
卿為治喪立後傳其遺文去之其故所守汀郡哭徐公
祠下繪像樹碑復為請祠於其鄉乃曰吾於徐公盡矣
東裝見戚於薊門戚為造卿督築館漢莊請草燕史未

竟戚去造卿曰吾不可廢成勞今後世無復知有戚將
軍遂留竣事官廩之造卿不受也其時夢熊正分部盧
龍塞從班荆道中而維揚顧養謙者以中丞鎮薊為造
卿治其館所樂飲造卿為養謙畫海漕活遼人以十餘
萬計造卿名僅籍太學所知交盡當世名卿賢士大夫
摩畫成敗論古今得失源委九邊三輔列藩阨塞夷險攻
守所宜如列眉觀火行不齋書問以典故疑義及奇事僻語
莫有能難者久於塞上人親附之欲留之不得晚歸故

山婆婆麟巖石竺靈源間輒命酒叫呼人莫窺其意

恭介鄭環浦先生世威

鄭世威字中孚號環浦福建長安人幼凝重寡言笑年
十三即惡流俗紛華題其齋曰志樂顏瓢貧甘范甑弱
冠舉於鄉嘉靖八年成進士會臺臣闕詔從諸進士推
擇衆競趨之世威曰纔脫章句躡司耳目耶獨不赴銓
除戶部主事一日忽心動疏請改南以便父養未得命
而訃至免喪補刑部晉員外郎恤刑秦中釋寃獄九十

六人擢為廣西按察僉事尋改廣東丁內艱復除江西
貴溪夏言再召入相諸司往賀開角門延入世威便却
退呼閣者曰相國尊然奈何令邦大夫縮縮旁趨還吾
刺去爾閣者開中門乃入言未子也巡撫汪元錫偕言
有事上清宮以祝釐為名實為相祈子世威從諸司往
拜前視祝詞乃知之遂不拜出轉浙江布政叅議言再
相世威復不與諸司郊迓轉江西按察副使時分宜嚴
嵩代夏相勢強甚族黨莖橫莫敢問世威輒用三尺繩治

有抵重法者獄具矣傅巡撫撼於嚴將改論世威持不
能奪熊憲副者嚴姻也以輕直占廢寺田千餘畝世威
鬻以賑饑熊持相手書求救不得遷四川叅政念嵩終
螫已投檄歸歸而薪粢不贍畊鋤自力怡然安之懸車
十六年而嵩敗中外交薦起湖廣叅政南京右通政隆
慶初擢都察院右僉都御史左副都御史華亭相徐階
為王守仁學廷議有舉守仁從祀者世威迺疏言王守
仁當世豪傑叅之名臣無愧謂其紹周程宗孔孟則平

生庸德有不足矣且其率天下徑趨直行使聖門講學明理之功屏棄不用將有毫釐差而千里失者與守仁同時講學者秦和羅欽順惠安張岳世稱賢大夫兩嘗指擊其謬守仁辨不能絀蓋守仁以名勝欽順岳以實勝實之與名相去遠矣文貞不是也顧其事亦寢時新建學方盛行諸貴人見其疏弗善也廼以為南吏部侍郎名雖擢而實遠之歲餘乃召入刑部未幾有詔採合浦珠及滇南珍石世威疏請上納忠諫崇節儉不報江

陵為政厲威權以屬禮願使九卿世威行意自若一無
所阿承時時嘆曰吾方壯時迺貴溪分宜幾陷虎口今
老矣安能以僅免之身而便辟唯諾新貴人前哉遂堅
意乞休得旨致仕歸而耕鋤如故里中不知侍郎云生
平以慎獨為要力行為宗與人交久要不忘一切脂韋
緣飾語籠罩款曲狀不獨有所恥而不肯為亦其性有
所執而不能為者其學一以濂洛為宗取六籍及儒先
語日誦繹之錄其精者獨證於心曰直諒為友嚴師為

師展也宋儒實獲我私年八十二卒賜祭墓贈尚書諡
曰恭介禮官言其歷官權貴之鄉媚竈是恥辭榮寂寞
之野杜門自高晉江黃恭肅銘其墓謂中孚有一介不
取之廉然飲人以和弗為谿刻其學不立門戶而淵源
可紹真儒之統所著有四書問答長樂乘岱陽彙稿藏

於家

閩書

越章錄

通判林世獻先生廷琛

林廷琛字世獻懷安人嘉靖十四年進士授戶部主事

四奉命督稅大著廉名朝中為之語曰林主事何稜稜
官理所至一片冰歷郎中監崇文稅缺人部尚書梁材
復使縮之曰必君乃可有倚勢觸禁者廷琛置不顧會
朝正後諸後至者率向閣人為好語廷琛不能也坐謫
判鎮江兩院交薦有南寧之命會權奸別有所擠持旨
未下有欲為廷琛私營賂者廷琛知而峻止之曰此豈
林世獻平生遂棄官歸原憲懸鶉子桑濕突晏如也司
徒馬森曰余海內知交稱廉介者汶上吳嶽南雄譚太

初吾閩則鄭世威林廷琛其最矣

閩中理學淵源考卷四十五

欽定四庫全書

閩中理學淵源考卷四十六

廣平府知府李清馥撰

成化以後諸先生學派

明代成化以後師席踵起是時一術專師家無異說
一代人才於斯為盛嘗讀顧氏日知錄論科舉業云
林文恪福州府志曰余好問長老前輩時事或為余
言林尚默誌方游鄉序為弟子員即自負其才當冠

海內士云

林誌永樂壬辰進士鄉試會試皆第一殿試一甲第二

然考其時試

諸生者則楊文貞金文靖二公也夫尚默當時所習特舉子業耳而楊金二學士皆文章宿老蔚為儒宗尚默乃能必之二公若合符節何哉當是時也學出於一上以是取之下以是習之譬作車者不出門而知適四方之合轍也正德末異說者起以利誘後生使從其學毀儒先詆傳注殆不啻弁髦矣由是學者俛俛然莫知所從欲從其舊說則恐或主新說從其

新說則又不忍遽棄傳注也已不能自必況於人乎
嗚呼士之懷瑾握瑜範馳驅而不遇者可勝道哉是
故射無定鵠則羿不能巧學無定論則游夏不能工
欲道德一風俗同其必自大人不倡游言始按此段
論科舉之學實闕風氣盛衰今錄附此見彼時趨嚮
端的人文向盛由此道耳綴其大畧附之篇端

郡守許履夫先生坦

許坦字履夫閩縣人宋許將之裔成化十四年進士仕

大理知府居官才敏著稱精易學門下多所造就有平齋雜稿子繹温州教授繼南安知府孫嗣宗歷官郎中其先知新建崇仁二縣實心實政百姓德之

閩書
郡志

新

縣令鄭德輝先生蘊中

鄭蘊中字德輝閩縣人成化十六年鄉薦授石首教諭學邃春秋多所造就文章德行後進仰止擢貴池令與上司議獄不合拂衣歸家居夫婦織席為食有門下以御史按閩屢候弗見也一指揮防海欲得善地持厚賄

乞闕說嘆曰胡為及我再三慚之蘊中呼里人欲執詣
官指揮跪請曰御史念公貧藉此為餽耳終不納年九

十餘終

閩書

通志

長史陳先生克震

陳克震懷安人少貧耕於野以舟載糞艤石橋側時月
夜諸生方聚講中庸克震執手傍聽竊竊笑之諸生怒
曰傭也何知克震曰嘗學而聞之異乎諸君之說也遂
為講解其義諸生歎服改容舉成化七年鄉薦授慈谿

訓導振作師道門下以明經舉者甚衆官終長史弟坡

子京

閩書

同知葉叔理先生性

葉性字叔理閩縣人弘治二年鄉薦官終慶遠同知慈
祥愛人以理學誨士一時翕然宗之

閩書

教諭陳時勉先生德懋

陳德懋字時勉侯官人弘治十四年鄉薦任平陽教諭
善講解於經書要旨多獨詣常集諸生於齋舍督課學

業察勤惰每至丙夜不輟賑貧却餽多士相慶得師

通志

長史鄭節之先生伯和

鄭伯和字節之閩縣人弘治十四年鄉薦授無為州學正轉國子博士秩滿當遷吏部郎薛蕙其門人也欲援之伯和固求散地乃以為壽府長史久之致仕歸伯和坦夷長厚未第時以禮經授門下士甚衆及拜官為教職不樂他徙歸後猶誨誘後進不倦聞人之善若已有之見人子弟力學有得辟舉者若已子弟得之也天性

至孝嫡母林幼撫有恩遇忌日必哀慕年逾耳順祭猶泣下親黨貧者隨多寡周給力雖不足而意每有餘鄉人咸敬服其德焉

萬曆府志

縣令洪繼明先生

洪昺字繼明懷安人弘治十四年鄉薦知郟城縣謹厚有文精禮經多所教授子世文世遷

主事黃叔和先生

黃鏗字叔和閔縣人正德二年鄉薦歷工部主事精於

易學受業甚衆孫功懋

郎中王維周先生希旦

王希旦字維周侯官人正德八年鄉薦早有文名以文見知於汪太宰鉉以為其部司務歷禮部郎中以憂歸尋卒希旦在禮曹時御史請以薛文清瑄從祀下部會議時薛學未尊諸公尚有可有否獨希旦以為求士於六經章句之後則躬行為急瑄之學實自敬始從祀為宜希旦甘於貧其歸也環堵畝宮至不能舉火處之漠

然 閩書 通志

奉常林質夫先生公黼

林公黼字質夫號石峰長樂人正德十二年進士授大理評事時江彬錢寧導武宗南巡羣臣有諫者彬輩每勸武宗杖之公黼約同官以疏諫武宗震怒命鎖項械手足暴庭中五日復繫詔獄一杖獄中再杖闕下舁至旅舍卒公黼居常恂恂雅飭薦紳知者謂其清修善人而已及其勇於赴義臨死生而志不懾氣不餒浩然有

烈丈夫之風少沉敏力學閉處一室端默誦習飲食不
闕其家人者三年故其學精通經傳子史旁及訓詁韻
切篆籀諸書性孝友居父母喪哀毀蔬粥三年跣步未
嘗遠几筵事其二兄甚謹平生所為可質鬼神敬獄明
讞不以一字喜怒於人當公黼下獄而郎黃鞏及行人
張岳並在繫中鞏與公黼交素淺比熟其行乃私謂岳
曰吾取友幾遍天下而乃近遺林質夫嘉靖初贈太常
丞予祭錄其子逢春為太學生逢春歷推官通判榮府

長史所至有廉能聲以養母疏歸

通志
省人物考

越章錄

分

少卿謝維盛先生贊

謝蕢字維盛閩縣人正德十六年進士選禮科給事中
敢言事肅皇初御極虛懷求諫而楊廷和為首輔擁掖
言者每言官上封事率優詔荅之時有乳媪濫封爵賞
具疏諫因勸上節恩澤戢內侍已又論救翰林呂柟等
上懼然聽納嘉靖三年大禮議起張璁時方為主事與
相廷和論不合蕢同諸給舍力爭上怒詔杖闕下無何

復論璉桂萼輩儉邪不可用復奪俸三月其明年使粵
東西蕘疾在外諸司刑憮酷非上好生意具疏乞戒止
天子感焉為下詔榜諭天下尋擢太平守未上卒於途
蕘在言路號知大體隆慶改元錄世廟言事諸臣贈太
常寺少卿

越章錄

按察李在中先生士文

李士文字在中連江人正德十一年鄉薦授高明教諭
寡默宏博本經義以訓諸生當道薦嶺南師範第一以

父喪歸聚徒講學於九龍山之麓服滿補嘉魚教諭登
嘉靖己丑進士除南京工科給事中會星變䟽陳六事
世宗嘉納之累官都給事中終浙江按察使家居布衣
蔬食徒步里中按閩使者白賁憐其貧欲為營室力辭
不受所著有易明心學庸正義

新福州府志

通判徐汝澤先生灌

徐灌字汝澤懷安人嘉靖元年鄉薦文學雅邃深明易

理終金華通判

閩書

司訓張伯時先生世宜

張世宜字伯時懷安人祖潛教諭父孟敬安吉州學正以多聞稱一時世宜嘉靖四年鄉薦司訓祁門清穆和易博綜三禮士多質正贄覬未嘗及其門一時譽髦之盛皆其造就

新福州府志

閩書

通判鄭用行先生守道

鄭守道字用行懷安人嘉靖七年鄉薦於書無所不窺而學務窮理嘗主白鹿洞教事著太極圖說意并易乾

坤上下繫辭解大學講章深思精詣能闡周程之秘令
夏津扶弱抑強風節凜介復建書院與諸生講晰一時
文學之士誦誦興起擢徽州通判徽人亦服其多聞

閩書

學正王汝旦先生應槐

王應槐字汝旦閩縣人嘉靖七年鄉薦初授高唐州學
正服闋補太倉敦尚氣節一以方正率士太倉州守廷
辱士應槐叱守白其寃即拂衣歸年三十餘耳歸以尚
書教授子弟家徒四壁窮約終身

閩書

郡守廖師文先生世魁

廖世魁字師文懷安人嘉靖十四年進士官終瓊州知

府精易學門下教授多所造就

閩書

教諭許先生興繇

許興繇閩縣人選貢嘉靖中任奉化教諭閒居衣冠不
懈令士子讀書必反之身心深以迎合時好為恥奉化

人稱其範模

閩書

州守陳道從先生址

陳址字道從連江人嘉靖十九年舉人知臨高縣臨俗
婚姻多寒盟址著正始編以矯之邑於是無婚姻之訟
遷知嘉定州旋歿於瓊州海上士民思之與胡銓並祀
二賢祠所著有易經摘說春早集

通志

同知林學靜先生資深

林資深字學靜福清人嘉靖二十五年舉人授羅雄知
州改補崖州黎蠻雜處民多失業乃相地濬溝引南北
水合注平壤溉田數萬畝黎寇與多港構難撫諭有方

境內救寧民碑而祀之遷高州府同知化州州多火患
教民易茅以瓦會讞大獄與監司牴牾掛冠歸所著有
五經精言弟資瀾嘉靖甲子舉人知孝豐未任卒

通志

中允陳德言先生謹

陳謹字德言閩縣人為文溫厚平實指言時事不激不
阿徐文貞階為考官深器之嘉靖三十二年廷對世宗
親擢第一授翰林修撰文貞留與語見其於天理人欲
君子小人之際辯之晰而持甚堅已察其所為自朝謁

外閉門讀書不輕交接妄取與益重之後三年遣使冊封藩府以拜命後期出為惠州推官居一年改南京太僕寺丞尋改尚寶寺丞又三年轉南京國子司業考績入都留為中允踰年丁父憂守制家居謹夙有才名又溫潤醇雅晉接不倦士人快覩樂從造門請業殆無虛晷居一載會其家人與兵卒相毆謹出解之要經在身無威儀遂為亂槌所傷卧病月餘卒事聞京師給事中岑用賓劾閩撫汪道昆威令不行於士卒養成桀悍之

氣白晝大都賊虐近臣恬不為怪宜亟罷道昆然後按
治諸驕卒以正法紀䟽入上罷道昆回籍聽調令巡按
御史陳萬言捕首惡把總曹一麒等萬言以屬監軍副
使金淞淞恐生變白萬言待一麒護容兵歸日捕之一
麒等乘間亡去萬言以聞淞坐奪俸一月蓋嘉靖之季
閔寇甫定容兵驕悍法紀玩愒矣所著有內制集詩文
稿藏於家子一愚

閔書

通志

遊擊陳季立先生第

陳第字季立連江人少博極羣書文名甚著個儻自負
喜談兵嘉靖四十一年戚繼光征倭至連第與定平倭
策俞大猷應召聘與俱隨以邊事上書大司馬譚綸奇
而薦之起家京營守古北口歷遊擊將軍屢有戰功以
忤巡撫吳允拂衣歸時年近五十絕意仕進惟以著述
自任作伏羲圖贊一筆圓成不待奇耦離析而萬千五
百二十之策悉出自然又作毛詩古音考尚書疏衍麟
經直指屈宋音義皆考古證今理解精醇金陵焦竑老

年好學第聞之裹糧至白門與相辨析竝嘆服自謂弗
如晚出遊五岳足跡幾遍天下閩巡撫屢行薦辟皆不
就卒年七十七門人彙集其所著詞賦漫題松軒講義
意言謬言寄心集書札燼存薊門兵事防海事宜東番
記塞曲粵草等書並刻行世

閩中理學淵源考卷四十六

欽定四庫全書

閩中理學淵源考卷四十七

廣平府知府李清馥撰

隆萬以後諸先生學派

前輩嘗言古人罷黜百家獨尊孔氏之旨者欲其道術之一也明之中葉喜新立論詆譏前儒漸趨詭僻士習由是多歧其始蓋由一二聰明才辯之徒厭先儒敬義誠明窮理格物之說樂簡便而畏繩束說者

謂其端肇於南宋之季朱子彼時曾痛切言之謂此事實關世變明之末造得無類是乎三山先正如葉氏朝榮翁氏興賢盧氏一誠諸公於波靡俗弊之餘獨屹然為師表指南維持終不墜易之碩果詩之典型蓋近之矣

郡守盧誠之先生一誠

盧一誠字誠之福清人萬曆八年進士授行人歷遷南京戶部郎江右守臣為南昌新建二邑諸改折時邑多

貴人莫敢難一誠曰南都根本重地四方多故兵食日
增虛廩庾以自弱非計之得力格之白下士大夫俎豆
玉新建招一誠入社講學謝不往曰吾不能口誦程朱
而心叛之也出知潮州毫無染指有黠僚筦郡權乾沒
多以其餘遺一誠一誠怒斥之臺使知其廉欲并屬以
權事一誠曰奈何奪丞倅職無已請為稽覈可耳凝操
峻行為守郡僅見晚歲居道山麓有朱子石室清隱齋
杜門謝客手著四書講述學者奉為指南云

通志
南源委
道

副使鄧汝高先生原岳

鄧原岳字汝高閩縣人萬曆二十年進士由戶部郎出督滇學陞湖廣叅議晉副使卒原岳巖巖岳岳所至以強直稱在滇時稅璫虐醵縱爪牙笞辱諸生原岳捕治之囊以三木璫遜謝乃解葉向高銘原岳墓稱閩自國初林子羽王孟敷輩以詩名號十才子其後則有鄭吏部繼之吏部歿絕響矣年來才士蔚起復修明其業而鄧公為之鼓舞其間風雅大振云

閩書

通志

員外郎王永啟先生字

王字字永啟閩縣人萬曆三十八年進士歷南兵部武選員外郎嘗有德於南部武弁衆建祠雨花臺祀之後擢山東督學叅議又轉北戶部員外郎著有詩文集及經書說行世

王穆仲先生夢猷

王夢猷字穆仲古田人鄉舉不第試太學補第一聚徒

鄉校學者師之

閩書

貢士李士殷先生仕黼

李仕黼字士殷長樂人表望學校四方名士多出其門家貧却諸生贄禮教人以孝弟修身為本兄弟四人養葬父母皆出其手著五經纂要及貢而卒

閩書

陳五雲先生名世

陳名世字五雲福清諸生母林患脾痛號呼不堪名世嚙指分痛至老左手兩甲猶脫娶王氏奩厚名世承母志分給兄弟之貧者父母卒哀毀幾失明終身孺慕不

袁所著有雜記二十四卷禮記彙二百餘卷卒年七十

四

通志

推官林穉虛先生茂槐

林茂槐字穉虛福清人萬曆二十三年進士授梧州推官治有異蹟著有音韻訂訛字學書攷四書經史決疑等書

通志

侍郎董崇相先生應舉

董應舉字崇相閩縣人萬曆二十六年進士初任廣州

教授稅璫李鳳恃威寵欲得學宮閒地馳射應舉率諸生羣斥之璫氣奪又禁璫繫馬宮牆名為南博士轉南吏部改北敎歷四司所舉高攀龍鄭三俊劉宗周等皆得召用遷太常少卿疏請安插流民開墾屯田詔拜都察院右副都御史奉命至天津買荒葺地開屯自涿州武清寶坻保定青縣三河延袤千里所屯種一十八萬畝有奇募人開河治閘以便海道歲兌運四萬八千三百餘石復請葛佑屯兵以所入抵餉無轉輸和糴之費

書數十上皆得旨崔魏忌之目為黨人因格其議以所
屯隸州縣遂無成功復遷戶部侍郎督理錢法條陳鑿
鑿為附璫者誣奏奪職居鄉建築附海城堡及疏水利
修學校置社倉義田議官糴嚴海禁論澳課皆造福桑
梓暇與諸生講學老而不倦著有崇相集十七卷卒年

八十三

通志

紀事林行甫先生子勉

林子勉字行甫閩縣人萬厯恩貢選長泰訓導教士先

實行時廉其貧者周之轉泉州府教授相國李廷機每
稱為金玉君子擢益府紀事歸著有易經說四卷蓬草
五卷石溪集八卷子應典字儀廷以貢選雲和訓導著
有經史要二十卷古今奇觀十卷宦遊草二卷龍門集
六卷長孫贄卿善詩文有傳硯堂集三十卷李孫榮芬
順治辛卯舉人翰林待詔工詞翰有如蘭稿

新福州府志

閩中理學淵源考卷四十七